



Broj/Broj: 03/1-50-14-7-7/11

Sarajevo/Sarajevo, 9. 11. 2011. godine

PREDMET: Informacija o sastanku s ambasadorom Republike Albanije u BiH

Drugi zamjenik predsjedavajućeg Zajedničke komisije za odbranu i sigurnost BiH Šefik Džaferović primio je, 13. 10. 2011., ambasadora Republike Albanije u BiH Nj.E. Flamura Gashija. Sastanku su još prisustvovali i predstavnici Ureda sekretara Zajedničke komisije za odbranu i sigurnost BiH Željko Grubešić, stručni savjetnik, i Jovica Katić, stručni saradnik.

Šefik Džaferović ukratko je upoznao ambasadora s trenutnim stanjem na putu Bosne i Hercegovine ka evropskim i evroatlantskim integracijama, te ulogom Parlamentarne skupštine BiH na tom putu, naglašavajući pri tome hitnost rješavanja onih pitanja koja su institucije Evropske unije i NATO označili kao prioriteta za našu zemlju, a to se prije svega odnosi na realizaciju presude Evropskog suda za ljudska prava u predmetu Sejdić i Finci protiv BiH, kao i rješavanje pitanja nepokretne vojne imovine.

Ambasador Gashi naveo je da će se Albanija, kao zemlja koja je punopravna članica NATO-a, i dalje zauzimati za progresivni put Bosne i Hercegovine ka stalnom članstvu u NATO-u, te pružiti našoj zemlji svaku pomoć potrebnu za realizaciju uslova predviđenih Akcionim planom za članstvo (MAP). Još je naveo da je Albanija u drugoj polovini ove godine preuzela predsjedavanje Jadranskom poveljom, političkim opredjeljenjem zemalja Zapadnog Balkana koje se pokazalo izuzetno uspješnim u njihovom procesu evroatlantskih integracija.

S tim u vezi, ambasador Gashi je, također, zamolio gospodina Džaferovića da delegacija Zajedničke komisije za odbranu i sigurnost BiH učestvuje na predstojećoj Konferenciji Jadranske povelje A5, koja će biti održana 24. i 25. 10. 2011. u Tirani. Osnovni cilj održavanja ove konferencije je davanje snažne podrške saradnji zemalja Zapadnog Balkana po principima Jadranske povelje, te jačanje sigurnosti, stabilnosti i prosperiteta u njima, kao i ubrzanje reformi koje jačaju demokratske institucije, vladavinu prava, ljudska prava i građanske slobode u regionu. Ambasador je naglasio da je učešće Bosne i Hercegovine na ovoj konferenciji izuzetno značajno, te naveo činjenicu da je Parlament Republike Albanije osigurao i pokrio troškove hotelskog smještaja za sve učesnike Konferencije.

Šefik Džaferović zahvalio se ambasadoru Gashiju na pozivu koji je uputio Zajedničkoj komisiji u ime Parlamenta Republike Albanije, te naglasio da će Zajednička komisija za

odbranu i sigurnost BiH na svojoj narednoj sjednici, koja će biti održana 18. 10. 2011., razmatrati ovaj poziv, te zauzeti stav o učešću svojih članova na pomenutoj konferenciji, nakon čega će o dogovorenom informirati organizatora, kao i njega lično.

DRUGI ZAMJENIK PREDSEDAVAJUĆE
ZAJEDNIČKE KOMISIJE
Šefik Džaferović

Dostavljeno:

- naslovu
- a/a